


La GVG preschenta in bun resultat malgrà in incendi grond

Malgrà il char incendi grond d'in hotel ad Arosa serra il quint da la GVG cun in resultat positiv. Il triangul da l'assicuranza d'edifizis: assicuranza – prevenziun – pumpiers è anc pauc enconuschent tar la populaziun.

Ralley final tar ils donns e tar ils stabiliments

Ina veglia sabientscha da l'assicuranza d'edifizis di: "Fatg giu quint vegni pir ils 31 da december". Suenter Nadal è la partiziun "pumpiers" da la GVG vegnida messa a la prova. Gronds incendis da guaud en la Val Mesauc ed en la Val Calanca han pretendì bler dad ella e dals corps da pumpiers da las vals. L'incendi suandant en l'hotel Posta ad Arosa n'ha alura betg mo occupà ils pumpiers, mabain er duvrà ina gronda part da las finanzas da la GVG: Cun ina summa da donn da ca. 15 milliuns francs sa tracti dal cas da donn il pli grond dapi bunamain 28 onns. Tut ils donns han importà 24,8 milliuns francs. Quai è circa 12 milliuns francs dapli che la media da blers onns. Per fortuna è ina part dal donn tras l'incendi grond cuvrada d'ina reassicuranza e per fortuna èn ils donns elementars restads cun 3 milliuns francs cleramain sut la media dad 8,2 milliuns francs. Sin il plaun operativ resulta ina perdita da 4,9 milliuns francs. Questa perdita resulta da la subtracziun dal resultat da gestiun da -14,4 milliuns francs plus la dissoluziun da renzients tecnicis d'assicuranza da 19,3 milliuns francs tenor la valitaziun externa da la ristga. Al resultat positiv da l'interpresa da 26,2 milliuns francs han contribuì er ils resultats curunads da success da las investiziuns. Ils surplis da las investiziuns permettàn da cuvrir ina part dals custs da gestiun. Indirectamain profita la clientella d'assicuranza uschia tras premias d'assicuranza che na cuvran betg ils custs dals gudogns da las investiziuns. La performance totala da las investiziuns è stada 3,7 %. Il benchmark ha pia pudì vegnir terrà. Suenter la reducziun da las premias l'onn 2015 po la GVG porscher las premias segund bassas da la Svizra. Quai è pussaivel a lunga vista mo cun investiziuns curunadas da success e cun custs da donn bass.



Èn il niz ed ils custs da la GVG enconuschents?

Tenor enquistas e tenor resuns da la clientella è quella cuntenta cun las prestaziuns da la GVG. Ma la clienta u il client ha mo darar da far cun sia assicuranza d'edifizis – exceptà ils quints annuals. Perquai cumbina ella u el l'assicuranza er darar cun las duas autras varts dal triangul; la prevenziun ed ils pum-piers. Quai difficulescha fermamain la sensibilisaziun per la prevenziun cunter donns elementars, per la protecziun cunter incendis e per ils interess dals pum-piers sco l'alarm. Il concept da PR ch'è vegnì fatg l'onn 2016 duai gidar ad augmentar la segirezza, per exempel cun construir edifizis novs en moda pli segira e cun segirar meglier edifizis existents. Ils pum-piers duain vegnir reconuschids sco part dal triangul da l'assicuranza d'edifizis. En il cas d'urgenza duai vegnir dà svelt alarm ed ina generaziun giuvna qualifitgada duai vegnir garantida. A la populaziun duai vegnir demussà il niz coordinà dal triangul da l'assicuranza d'edifizis prevenziun - intervenziun - assicuranza.



Quai duai vegnir fatg cun prestaziuns a la clientella che persvadan sco cun ina cussegliaziun maximala en dumondas da segirezza u cun ina campagna d'infurmaziun 2017/2018. La GVG prevesa da sa preschentar a la populaziun da tut las regiuns dal Grischun. Quai cun agid d'in nov vehichel che simulescha incendis, cun agid dals corps da pum-piers locals e cun agid d'ina preschentaziun da prevenziun. Per pudair infurmar proprietarias e proprietaris d'edifizis, specialistas e specialists da construcziun sco er commembras e commembers d'autoritads directamain davart ils temas areguard las ristgas e l'abitar en moda segira, organischescha la GVG mintga onn in'occurrenta da segirezza. L'emprima dieta da primavaira cun Thomas Bucheli davart il tema auras extremas ha lieu ils 18 da matg 2017 a Cuira, en l'auditori da la banca chantunala grischuna.

Il niz da l'assicuranza d'edifizis è mo optimal, sch'ella cusseglia la clientella en moda fitg cumpetenta, sch'ìls donns restan bass e sche las premias restan zunt bassas er en la cumparegliaziun internaziunala, e quai malgrà in'auta prestaziun sco tar l'assicuranza da la valur da nov. Per cuntanscher questa finamira investescha la GVG en la furmaziun supplementara, en l'innovaziun ed en la meglieraziun permanenta da la qualidad, tenor la devisa: "Nus pudain adina ans meglierar in pauet!" Da quai fan part per l'ina l'augment da l'effizienz tras novas prestaziuns da servetsch sco p.ex. la cussegliaziun pertutgant la prevenziun cunter donns elementars, impuls da prevenziun u il nov corp da pum-piers da la viafier sco er per l'otra l'augment da l'effizienz grazia a las meglieraziuns currentas dals process, grazia a la digitalisaziun d'andaments e grazia ad ina direcziun che tegna quint dals custs.

Il rapport annual da la GVG po vegnir retratg gratuitamain sut www.gvg.gr.ch, telefon 081 258 90 00, info@gvg.gr.ch.

Infurmaziuns dat

Markus Feltscher, directur
Assicuranza d'edifizis dal Grischun · Ottostrasse 22, · 7001 Cuira
telefon direct 081 258 90 01 · markus.feltscher@gvg.gr.ch

⇒ A partir dals 26-04-2017, a las 12.00, po il rapport annual vegnir chargià giu da la pagina d'internet www.gvg.gr.ch.